

續

藏

書

續藏書二十三卷目錄

忠節名臣

劉忠愍公球

章恭懿公綸

鍾恭愍公同

廖恭敏公莊

楊觀察公瑄

附子源

黃少卿公鞏

附 陸震 張英 幷何遵等十二人

何尚寶公遵

孫忠烈公燧

許忠節公達

楊翰撰公慎

別見文學名臣

舒翰撰公芬

楊忠愍公繼盛

附 張翀

沈光祿公鍊

楊御史公爵

海忠介公瑞

續藏書二十三卷目錄終

續藏書卷二十三

忠節名臣

學士劉忠愍公

事 福陵 長陵 獻陵 景陵

公名球，字求樂，安福人。永樂十九年進士。初爲主事，儀制薦侍經筵修。宣宗實錄成，改翰林侍講。正統八年夏，雷震奉天殿應。詔陳十事。王振怒，公言總乾綱，意在詆振，欲置公死地。不得，會翰林修撰董璘乞爲太常卿事神下詔獄。公疏中偶言太常官必得儒臣，馬順附振喜曰：此可并殺。公遂酷考璘，誣服公。

爲畫此疏，矯旨逮公。當朝捽公去，公不知何坐，大呼死訴。太祖、太宗縛公至暗獄中，斧礮轔下，碎其體，極慘毒。其邑人成器，設公位龍泉山巔，爲文哭而祭之，人名其地爲祭忠臺。公天性忠潔，議論堅正，沉思積學，好義力行，文詞鏗鏘，金春玉映，人共寶之。如月墳天犀也。正統十四年冬，贈翰林學士，謚忠愍。子鉞、釤，舉進士，鉞官廣東叅政，釤雲南按察使。

尚書章恭毅公

事

裕陵

景帝

茂陵

公名綸，字大綸。初名峯，樂清人。正統四年進士，爲主事。南京禮部景泰初爲儀制郎中，屢有論建，又條上太平十四事，反復萬餘言。懷獻太子卒，人心危懼，御史鍾公諷禮部請復立沂王東宮。禮部大臣縮首，昨舌曰：「作死！」公聞發憤，卽具疏陳修德弭灾十四事，又言：「上皇君臨天下十有四年，陛下親爲臣子，又以天位授陛下，稱太上皇帝，天下至尊也。月朔望，及歲時節，旦宜率百官朝見延安門。」復汪后於

中宮以正壺儀復沂王於東宮以定國本上見疏  
大怒下公詔獄炮烙煅煉迫公引大臣及通南城狀  
體無完膚竟不承以鍾同先嘗上言并逮欲殺二人  
會天大風雨黃霧四塞乃止廖莊自南京來亦嘗請  
復儲遂縛三人至午門前杖一百鍾公死廖公遠謫  
公錮禁獄中越二年裕陵復辟輒歎綸好臣子爲  
朕家事受苦毒也出之獄中脫桎梏拜禮部右侍郎  
上令內侍檢公十四事疏不得內侍從旁誦數言  
上亟稱歎曰好官人公繫獄久因有足疾會石亨招

公卿飲公不往，短公。上前改南禮部，上面諭賜金幣文華殿遣行，尋改南京吏部。茂陵卽位，有司以遺詔請大婚，公上疏曰：山陵尚新，元朔未改，百日從吉，心實未安。釋服公除，雖有常制，顧諒陰大婚，情禮自別。乞勅禮部來春舉行。成化元年，兩淮饑，條救荒四事。四年，勅公會南臺高明考察，公欲盡去諸不職者，高公不可。公獨疏上，南諸司構公，激言官怒，並誣章劾公。上特遣侍郎葉盛、給事中毛弘卽訊留都，公誣得白。五年秋，星變，自効不允。秩滿轉左十二

年請老卒 泰陵卽位特贈尚書謚恭毅官其子立爲鴻臚主簿君子曰 裕陵 茂陵卒踐天祚者三君子爲有力矣成化初謝鐸預修 英宗實錄檢公復儲疏不得輒歎息泣下曰公疏動萬言竟一字不傳何以示天下後世數白總裁劉定之應曰奏疏留中者例不書謝公曰景泰數年間事就此爲大不書此奚書盍請 上增入錄中竟不從長子玄應給事中南京

寺丞鍾恭愍公

事

景帝

公名同，字世京，吉安永豐人。景泰二年進士，三年冬爲監察御史。公當易儲時，每獨坐深思，泣下而已。而懷獻太子卒，公入朝待漏，與禮部郎中章綸論儲位事，慷慨流涕。五年九月，公遂上疏請復立沂王東宮，以固宗社。并陳時政闕失，疏入縛下詔獄，械繫極苦。杖之不死，又下獄。六年八月，又杖闕下，下獄竟死獄中。時年三十二。骸掩圜土，莫敢收葬。裕陵復碑曰：鍾同忠誠節義可貫金石，贈大理左寺丞。官其子啓知。

縣。茂陵又憐公忠受慘禍，祿公妻羅氏官其一子。  
通政知事啓上疏，請公遺骸得出圈土歸葬。時公歿  
久矣，血漬簪間，洗出倍鮮。好成化二十三年，公子援  
綸例，請謚禮官謂公應詔陳言中及復儲事，不若綸  
言詳切，孰不與謚？衆共嗤笑，禮官恥之。公得謚恭愍。

尚書廖恭敏公

事

獻陵

裕陵

景帝

公名莊，字安止，吉水人。宣德五年進士，八年選庶吉士，十年給事中刑科。正統六年出陝西賑饑，得便宜從事。當是時，西楊在內閣，公抗章劾西楊不職。八年署大理寺事，踰月陞大理丞。十一年陞少卿，南京大理。景泰五年七月，災異下詔求言。公上疏仰唯。上皇被留虜庭，皇上撫有萬方，屢降詔書以大兄皇帝鑾輿未復，虜讐未報爲意。皇上之心，卽堯親九族、舜徽五典之心也。賴郊廟神靈，皇上勝算迎歸。

上皇於南宮臣遠臣未知。皇上於萬幾之暇，曾時朝見，以叙天倫之樂。敦友愛之情否也。臣自爲翰林之初，遣太師英國公張輔，吏部尚書郭璡爲正副使，冊封。皇上奄有大國，每遇正旦冬至，令羣臣朝。上皇於東廡百官感。上皇兄弟友愛如此。今幸上皇迎歸，伏望篤親親之恩，萬幾之暇，時朝見。上皇於南宮，或講明家法，或商確治道，仍令羣臣時得朝見，以慰上皇之心。如此則孝弟刑於國家，恩

義通於神明。灾可弭而祥可召矣。然所係之重又不  
特此太子者。天下之本臣愚竊以爲上皇諸子、  
皇上之猶子也。宜令親近儒臣誦讀經書以待皇嗣、  
之生使天下臣民曉然知皇上。有公天下之心。蓋  
天下者太祖太宗之天下仁宗宣宗之繼  
體守成者此天下也。上皇之北征亦爲此天下也。  
今皇上撫而有之必能念祖宗創業之艱難思  
所以繫屬天下之人心近年日食星變地震且陷山  
崩水溢灾異疊見非止霜雪不時而已臣謂弭災召

祥之道莫過於此。詞意悲懇。留中不報。明年閏六月。  
以內艱來京。適章鍾二疏入。上忽念公徃年有疏。  
大類二人。并逮三人杖午門前。幸不死。謫定羌驛丞。  
裕陵復辟。召還。時內艱未闋。繼遭父喪。上憐公忠。  
特并與祭葬除服。改南大理言官。劾公公請老。上  
曰。莊有大節。逾年卒。贈刑部尚書。諡恭敏。公任性易  
直。而好剛尚氣。言辭憤激。人不能堪。公雖無芥蒂。人  
故益恨公。公又不屑細行。遠嫌疑。好存謝賓客。諸遊  
知爲懼狎。及至卒時。無以爲殯斂。衆率錢相哀助。人

始信公廉靖其闊達天性然耳

按察使楊公

事

景帝

裕陵

茂陵

楊公瑄者，字廷獻，豐城人。景泰五年進士。天順初爲御史，印馬坼內民羣訴曹石二凶奪民田若干頃。公疏劾二凶怙寵擅權勢。上喜公敢言，稱職。命吏部記公名，且大用。旣還京，彗孛連見，祥亨二凶日益張。公與十三道御史議，班劾二凶。有洩語二凶者，二凶先譖諸御史。上前暨彈章入，上怒，召諸御史詣文華殿，俾誦彈章詰公。公與御史周斌且誦且對，歷陳二凶罪狀甚悉。下諸御史詔獄，逼公誣引大臣刑。

甚慘酷，數瀕死。卒一語不他及，理刑者文致公坐死。掌道者謫戍餘貶斥奏上，會京城大風雹，拔木壞屋，走正陽門下馬牌于郊外，得從末減。公竟戍遼東鐵嶺，道遇赦還，或謂公宜詣二凶謝，庶免後禍。公不可，復謫戍廣西南丹。二凶相繼逆誅，釋歸。茂陵卽位，言官論奏復公官尋陞浙江按察副使，定海城北捍海塘，縣西走馬堤，露衢所裏外海塘，健跳所海鹽海塘皆公修築。海鹽塘踰二千三百丈，工尤巨，禦患尤大。陞按察使，甫半載病亟，察案問候尚諭築海塘法。

及瀋西湖之利，率祠海鹽東海上，著祀典。子源弘治

間任五官監候正德元年七月源上疏言占候得大

王執

藝事

以成

事

角及心中星動搖天璇天機天權星不明乞安居深  
宮絕遠遊獵罷弓馬嚴號令毋輕出入闢除內侍寵  
倅遊逸小人節賞賜止工役親元老大臣所講習詩  
書疏下禮部部言源占候之言深切時弊源復疏言  
十月二十六日占候得連日霾霧交作爲衆邪之氣  
陰冒於陽臣欺於君小人擅權爲下叛上引譬甚力  
劉瑾怒矯旨杖三十源又疏言自正德二年來一向

占候得火星入太微垣帝座前或東或西往來不一  
乞思患預防瑾又大怒罵源爾何官亦學爲忠臣乎  
矯旨又杖三十謫戍肅州行至懷慶卒於河陽驛妻  
斬蘆覆尸葬之

死

少卿黃公

事

泰陵

康陵

永陵

黃鞏字伯固莆田人弘治十八年進士推官德安府陞主事刑部掌十三司獄牘陞員外郎改兵部歷車駕職方郎中內艱服除會康陵北狩人心危疑或沮公行公題書屋曰石田茅屋爲生太拙鴟夷馬革自許何愚衆不能沮竟北上補武選正德十四年春上將南巡時寧庶人久蓄逆謀蕭敬朱寧張銑在司禮錦衣東廠與庶人交通江彬又握勁兵在上左右公卿交疏不聽兵部司屬倡諸司上疏諫公曰

上巡遊本起彬誘惑彬方席寵擅兵無敢斥言彬吾不可舍彬爲支語恐

上不悟獨疏六事其略曰

詠巡遊封第一  
陛下臨御以來祖宗之紀綱法度一壞於逆瑾再壞

於佞倆又再壞於邊帥之手至是將蕩然無餘矣天

下知有權臣而不知有

陛下寧忤

陛下而不敢

忤權臣

陛下弗知也亂本已生禍變將起竊恐

陛下知之晚矣試舉六事於今爲最急者一曰崇正學嘗聞先儒周敦頤有曰吉凶悔吝生乎動吉一而已動可不慎乎故唯聖人爲能慎動仰唯陛下聽

明天縱有古帝王之資，然所以盤遊無度，流連忘返者，論思勸講之臣，於是不能辭其責矣。伏望陛下高拱九重，凝神定慮，屏紛華遠佞人，二曰通言路。夫言路者，國家之命脈也。切見近時臣僚奏牘間或言及時政，往往匿不以聞。其或事關權臣，則又留中不出，而中傷以他事。由是雖有安民長策，謀國至計，無因以達。雖有必亂之事，不軌之臣，陛下無由而知。伏望陛下廣開言路，不責以出位，不加以好名，則忠言日進，聰明日廣。雖亂臣賊子，亦將有所畏而不

敢肆矣。三曰：正名號。孔子曰：名不正，則言不順；言不順，則事不成；禮樂不興；刑罰不中；民無所措手足。陛下近日以來，無故自稱爲威武大將軍、太師、鎮國公。遠近傳聞，莫不驚疑竊歎以爲恠事。夫陛下自稱爲公，誰則爲？陛下者，天下不以陛下事。陛下以下而以公事陛下，是天下皆公之臣，而非陛下之臣也。伏望陛下卽日削去鎮國公等名號，以昭上下之分，以明示天下之人，庶幾體統以正，而朝廷自尊不然。古之天子，亦有號爲獨夫，與欲爲匹夫而

不可得者竊爲之。陛下懼焉，四曰：戒遊幸。嘗聞大禹  
罔游于佚罔，淫于樂。周公告成王，母淫于觀于佚于  
遊于圃。陛下始時遊戲不出大庭，馳逐止于南內。  
論者猶謂不可。旣而幸宣府、幸大同、幸太原、幸陝西、  
榆林諸處，所至費財，動衆郡縣，騷然，至使民間夫婦  
不能相保。陛下爲民父母，何忍使民至此，虧損盛  
德，貽譏萬世。陛下自視爲何如主也？近者復有南  
巡之命，南方之民爭先，挈妻子避去，流離奔踣，敢怨  
而不敢言。卽今江淮間父子兄弟相食，天時人事如

此加以休息愛養尤恐不支况又重以蹙之其何不流而爲盜賊速而爲流亡也奸雄窺伺待時而發變生在內則欲歸無路變生在外則望救無及陛下斯時悔之晚矣彼居位大臣用事中官親暱羣小皆欲陛下遠出而後得以擅權自恣乘機爲利也不然則亦袖手旁觀如秦人視越人休戚不相涉也夫豈有一毫愛陛下之心哉彼誠愛陛下獨忍使陛下馳逐蒙塵而莫之救止也伏望陛下翻然悔悟罷南巡撤宣府行宮示不復出發內帑以賑

江淮之饑散邊軍以歸卒伍斥不御之女以各還其  
家雪既往之謬舉收既失之人心如是則尚可爲也  
五曰去小人嘗聞開國承家小人勿用謹按今之小  
人篴弄威權至于首開邊事以兵爲戲使陛下勞  
天下之力竭四海之財傷百姓之心至今紛紛未已  
則江彬之爲也彬本行伍庸流兇狠傲誕臣等但見  
其有可誅之罪而不見其有可賞之功今乃賜以國  
姓封以伯爵托以心腹付以提督京營之寄此養亂  
之道也彬外挾邊卒內擁兵權騎虎之勢不亂不止

天下之人切齒唾罵皆欲食彬之肉彬不誅天下之亂必自彬始陛下亦何惜一彬以謝天下哉伏陛大奮乾剛將彬下諸廷議明正典刑以爲奸邪小人迷亂之戒六曰建儲貳嘗聞漢人有言曰太子天下本本一搖則天下震動夫有本而搖天下猶震動况於無本其何以安恭唯陛下春秋漸高前星未耀祖宗社稷之託懸懸乎無所終寄方且遠事觀遊屢犯不測之區此必危之道也陛下徒知收置義子布滿左右獨不能豫建親賢以承大業臣以

爲陛下殆倒置也伏望陛下早及是時將近時  
羣臣建儲章疏通行檢出宣付皇親勲舊及在廷文  
武大臣共圖大議卽於宗室中遴選親賢一人養于  
宮中使視皇子以繫四海之望待他日誕生皇子之  
後俾其出就外藩如此則繼體有人國本以固實宗  
社無疆之休惟聖明留意車駕員外郎陸震見公  
疏卽碎已疏草曰願同署名進疏入二公自分必死  
彬見疏果大恨必欲殺二公縛下詔獄鉗校于廷五  
日三訊杖百餘坐繫逾月除名公體最羸衆咸痛公

必死，乃死得甦。震竟死，當是時，海內盛傳公疏，公歸，杜門著述，家素貧，客至留飯，或至日中未舉火，貸米鄰家，恬不屑意。嘉靖改元，召爲南京大理寺丞，未幾卒，無子，贈大理少卿。公嘗曰：「人生仕至公卿，大都三十年。惟立身行道，斯千載不朽。」世之人顧以此易彼，何邪？公沈敏好學，雖疾病，手不釋卷，詩文清粹，和婉，自成一家。震字汝亨，蘭谿人。正德三年進士，爲江西泰和知縣，有善政。去之日，民立祠祀。爲武庫主事，孝貞皇后喪，武宗自宣府奔喪歸，又復欲

出震抗疏諫、上怒、罪且不測、幸諸大臣力救得免。  
陞車駕員外郎、杖于廷死矣。復贈書與諸子曰：吾筆  
亂神不亂也，竟以瘞故卒。卒後三年贈太常少卿。子  
體仁廢國子生，爲通政知事。是時諫而杖死者贈主  
事何遵、劉校、尚寶卿、主事林公黼、行人司副余廷贊、  
太常寺丞刑部照磨劉珏、兵部主事行人詹軾、劉槩、  
孟陽李紹賢、李惠王翰、監察御史各廕子姪一人。入  
國子監。嘉靖初禮部主事仵瑜上疏曰：正德間給事  
中御史挾勢凌人，趨權擇便，交遊貴俠，飲宴園亭，凡

朝廷大闕失羣臣大奸惡緘口閉目不復救一時犯  
顏敢諫視死如歸或拷死廷闕或流竄邊隅者皆郎  
中員外主事評事行人庶吉士等官又張英本一武  
夫入諫就死行道悲傷諸給事中御史揚揚出入若  
罔聞知今幸聖皇御極褒恤忠諫此輩更何面目  
復立清明之朝耶章下吏部爲寢張英者京衛指揮  
使聞武宗南巡挾一刀囊土數升持諫疏當蹕道  
跪哭諫不允卽拔刀自刎血流滿地侍衛人縛送詔  
獄問英囊土何爲曰恐汚帝廷灑土掩血耳殞命

獄中無子嘉靖初憐其忠贈都指揮官英弟雄都指揮

李贊曰當瑾初用事時科道有言俱被慘禍其後勢成銓柄在已非其私人不置言路是以一時省臺皆爲不鳴之仗馬而捐軀死諫之士反在于翰林部寺諸臣也迨世宗新政若輩盡宜汰去而忤瑜之疏既下復寢豈當事者懼傷國體而不欲空署逐之耶抑猶有所避忌耶然讀瑜一疏若輩已當愧死矣

尚寶司卿何公

事

康陵

何公名遵，字孟循，南京欽天監人。以諫死。嘉靖初贈尚寶司卿。廕子世守入太學。既祀公鄉賢應天府。又請於禮部爲祠。專祀公宗伯霍公名祠曰廉直方武。皇帝朝瑾、彬相繼用事。彬導上遊幸。禱祠名山。將入江南。而寧濠方謀以侍子入朝。恃彬爲內應。比南巡詔下。彬幸得便窺伺。懼中阻。乃爲危言撼衆。衆亦相視搖手戒莫敢出語。甚則以訛言媚彬。彬氣益盛。兵部郎中黃翬、翰林修撰舒芬首以疏入。諸曹

稍稍踵之。武皇帝怒輩等彬復揚言輩旦夕且死，冀以脇衆。公已入疏，力言淫祀無補敗亂，且曰：「萬一宗藩藉口奉迎，潛懷不軌，則福未降而禍已萌，蓋指濠也。」彬畏事泄，匿不以聞。公慮衆爲彬所脇，又輩罪叵測，復與同官林大輅、蔣山卿上疏，乞罷巡幸，勿爲左右姦邪蠱惑。輩等無罪，願寬宥，毋使後世有殺諫臣名。不爾，臣與同死。彬旣欲杜衆口，聞是言，愈自懼，更四出機窺，下公等於獄。復嗾其黨劾言者懷奸訕上，無人臣禮。武皇帝益大怒，榜示朝堂，無得效尤。

遵等獄上被旨荷杖繫午門外五日杖五十罷遣  
彬自請視杖杖者故視賄爲輕重至是密奉彬意而  
賄又不至杖視他人爲甚公體故羸又憤所言不達  
瘡潰不可療越三日竟卒邸舍獨僅奴何安一人當  
草疏時諭覺之前持哭曰主縱不自計獨不念老親  
幼子邪公執筆從容曰無多言歸見大人爲謝萬死  
兒子令勿廢學足矣草草已書託鄉人太僕卿周金  
編修陳沂後事語不少亂蓋是時子世守方數歲公  
年三十四爾公旣卒南巡議亦竟寢公幼無他好爲

弟子員適武城王公純甫爲教授以道義劇切諸生  
一日策問范滂母事公感之歸告母曰兒設爲滂大  
人能慨然爲滂母乎母笑而許之正德癸酉舉鄉試  
甲戌第進士吏部尚書陸公完器重公未幾當試臺  
諫獨引疾弗出曰吾不可資人以進丙子拜工部營  
繕主事明年權木荆南故事多昵奸胥歲增羨以自  
潤商人苦榷過於虓虎公更置一切而壹以廉率之  
無何出羨千金左右勸以獻績怒斥之曰來者將何  
繼耶乃令下商自百金下減算三之一風水敗貲者

勿算以羨足常數但令相等入算者手實其數幾何  
自識之藏於郡帑其或越貸敗令與以謁至者盡沒  
入之威惠並舉至今守爲榷令比去行李蕭然卒之  
日貧不能殮待鄉人賻而後以襯歸葬先是被杖時  
父鐸與家人墓祭有鳥悲鳴而前心異之比抵舍聞  
工部有以言獲罪者鐸長號曰遵其死夫已而果然

見素志

尚書孫忠烈公

事

泰陵

康陵

公名燧，字德成，餘姚人。弘治六年進士，授刑部主事。歷郎中、正德六年超陞福建右叅政，歷按察使、河南右布政使。劉瑾亂政寧庶人已蓄逆謀，瑾誅，又結錢寧、張雄日夜諍中朝事，幸有變，又刦持省臣，賂諸文武大吏。九年乾清宮災，羣臣輒請建儲，庶人多輦金璧通奸，優臧賢，徧遺諸奸臣，欲且徵庶人子，名上廟燒香，成則自取之。諸奸臣既得庶人賂，又疑畏不敢發，直以好語給庶人，庶人自以爲事十成八九，日恣

橫朝議選才節大臣擢其機牙陞公副都御史巡撫江西公聞命歎曰投艱於我死生以之携二家童入南昌南昌洶洶謂庶人旦暮得爲皇帝諸省臣附黨及羣賊依附者相助爲聲勢公旁盡庶人奸黨言動輒告庶人先是宸濠中傷胡端敏公下詔獄得公力爲湔雪不死至是雖逆謀有迹顧宗室不敢先事訟言但託禦他寇曲爲備首城進賢又城南康又城瑞州南康安義鄉者盜賊淵藪近割地開爲縣饒撫二府罷兵備公曰緩急曷倚奏復饒撫兵備不果復又

請勅湖東道分巡兼理兵備與饒相爲犄角九江當湖衝最爲要害請重兵備權兼攝南康寧州武寧瑞昌及湖廣宜國通城廣信橫峯青山諸窯地險人悍設通判駐其地兼督六縣又恐宸濠一旦起刦兵器假以討賊盡出會城兵器外府公見宸濠逆謀急恐變起不測乃屢密疏言宸濠必反又盡爲宸濠伏途諸奸所得卽達上所又爲諸權倖盜致宸濠所索金璧謝公不得已乞休不允積憂勞數月髭髮盡白十三年江西大水宸濠所蓄賊凌十一吳十三閔念

四出沒鄱陽湖行劫。公與按察副使許達議，調兵勦之。三賊遁沙井去。公出不意，乘夜出江外掩捕，遇大風雨，不克濟。三賊竟走匿宸濠林墓中，不可踪跡。會言官發宸濠反狀，朝廷遣大臣卽訊。宸濠懼，十四年六月丙午，伏賊府中，俟諸守臣入，大言曰：「太后密旨召我監國。」公毅然應曰：「安得有密旨者？」又曰：「天祚暗移，汝獨不知邪？」公益憤，應曰：「安得妄言求死？」又曰：「我取南京，汝保驾否？」公益怒，張目直視。宸濠厲聲大罵。宸濠遂縛公許副使奮起爭。孫巡撫朝廷大臣。

爾安得辱侮無禮又縛許許且縛且罵賊錘折公左  
臂併許公殺惠民門外宸濠竟用三賊爲牙爪僞稱  
將軍首遣婁伯招誘賊黨至進賢知縣劉源清斬伯  
乘城拒守宸濠又遣人招窯賊窯賊有官司在不得  
發又大索兵器城中不得賊不得兵器皆持梃竿比  
至安慶王公起義兵擒宸濠湖中諸逋賊至安義縣  
有守吏不能走故盡獲湖廣浙江以饒撫故不被賊  
禍公死節久之阻于奸倖未得褒贈嘉靖改元贈公  
禮部尚書謚忠烈立祠祀江西叙其子堪錦衣百戶

進正千戶武舉第一人歷官都督次陞進士第二人  
歷官南京禮部尚書

尚書許忠節公

事

康陵

許公名達，字汝登，固始人。正德三年進士，長身巨口，猿臂燕頷，沈靜有謀略。初爲樂陵知縣，流賊猖獗，他縣閉門自守，或遺賊芻粟飲食弓馬。或棄城走，公募死士千人，持大梃隨賊向，突擊，人馬俱斃，賊不敢近境。以功陞山東按察僉事，分巡遼海東寧道。禮神愛民，下士詳獄，邊鎮懷輯。陞江西副使，時宸濠蓄逆，內外構結，莫敢誰何。公每繫其黨，引法批繩，剪其羽翼，又密勸巡撫孫公先發後聞。孫公以爲不可，使

賊反有名然亦重奇公凡規防機宜悉與公議宸濠並  
反公不屈曰孫都堂朝廷大臣不可輒無禮宸濠並  
縛公公罵賊汝反萬段磔汝汝悔無及宸濠遂呼賊  
推二公出公顧孫公曰早聽我言當不至此益罵賊  
不絕口至惠民門挺立賊刀斫其頸屹不動賊衆共  
摧抑令跪竟不得一跪遂死公父家居閑江西有變  
殺都御史副使二人卽爲位易服哭人恠問故父曰  
副使必吾兒也吾兒素有此志今果然矣嘉靖改元  
贈副都御史加贈禮部尚書謚忠節立祠祀公官其

子瑒、錦衣百戶、進正千戶、武舉、進指揮同知、錦衣、

修撰舒公

事 康陵 永陵

舒芬字國裳，生而穎異，不羣凡兒。六歲授孝經論語等書，輒了大義。年十二，郡守祝瀚修封洫至獻馴鴈賦，大奇之，薦補博士弟子、督學蔡公清試輒首，語人曰：「此天下士也。」中正德丁卯鄉試戊辰卒業南雍，嘗夜分不寐，於書無所不讀，而實勵志於聖學，最喜濂溪，嘗稱之爲中興之聖。所著有太極通書繹義，又作易箋問七十餘條，書論二十篇，詩稗說三十餘條，春秋疑義三十餘篇。一時名士，咸推讓焉。丁丑考官，陸

文裕公深薦第一、主試者抑居十一、及對大廷、萬言立就、是科制題獨詳、上自羲農以及近代、凡經史所載爲治之事、悉以咨焉、公敷陳道法、至詳至備、直言時弊、諄諄懇切、而卒澤於道德仁義、粹如也。

御批第一甲第一名授官翰林院修撰、時毅皇帝不時巡幸、公憂之、戊寅春二月、孝貞皇后崩、踰月、卽欲往視、山陵又革一應、擺路軍馬、公度其且至、宣府、遂上隆聖孝疏、謂三年之內、當深居、九重氣復外出、雖釋服之後、儼然煢煢在疚、如成王免喪

朝廟之時，又謂自古萬乘之尊，非奔竄避難，未有輕身不嚴侍衛者。既而又上車服疏，謂天子等威莫大于車服，而下同于庶人，甚非所以辨上下、定禮儀也。時虞有意外之變，故每疏之中，三致意焉。會江西洪水，決圩漂舍，遂乞恩終養，謂臣係獨子，無他兄弟。父母老疾，恐墳溝壑，辭極悽愴。凡五上疏，不允已卯春，車駕議以三月十九日壬子警道東巡祀岱宗，歷徐揚抵南京，下蘇州，復溯江浮漢，登太嶽，且遍中土繁麗。先是江西宸濠久蓄異謀，又結陸完、錢寧

輩爲內應，士大夫非忠義素定者，輒懷疑貳。以故一聞駕出，人情洶洶，皆以爲天下事不可爲矣。公乃慷慨曰：「車駕出必不利，此社稷安危之所繫也。」十五日早疏先入，乞留。駕言甚激烈，有曰：「痛哭泣血，不忍爲。」陛下言者江右親王倡吳濟之計，大臣懷馮道之心，陸完以祿位爲故物，以朝署爲市壓，以陛下爲奕棋，以革除年間事爲故事，復痛刺閣中，謂一切危亡之迹不苦言以救而聽。主上之自壞時完，以智術倖高位，利于主上遠出，則已得以自恣。

或濛之謀，倅遂則已。又有非望之福，故造爲惡語，沮抑諫者。謂主上聞直諫，便舉刀爲刎狀，且曰：今撒賴矣。初以此沮公，公不聽。復以此沮諸欲諫者。公乃邀考功夏公良勝、儀制萬公潮、太常陳公九川至寓，舍酌之酒，贊之曰：匹夫不可奪志。是夕，遂連疏入。時號江西四君子。明日，吏部張衍瑞等、兵部黃鞏、陸震等、刑部陸俸等疏俱入。又明日，禮部姜龍等、兵部孫鳳等、行人司余廷瓊等疏俱入。又有太醫院醫士徐鑿以醫諫，車駕遂不果出。向使公爲陸完沮，則夏

萬之疏且緩諸公之氣亦衰矣安得以尼主上之行哉乃二十日天威震怒命舒芬等百有七人于午門外跪五日未辰而入終酉而退公嚴整無異平時二十五日戊午命舒芬等于午門前褫衣杖三十公以疏首杖特甚神色不喪惟口呼高廟之靈冀以感動上心是日水溢內海子四五尺至不了橋衝折鐵檻大柱七根若斬然杖畢幾斃臥院中掌院者懼禍至使人揜出之公屹不爲動曰吾官于此當死于此又命爲首者調外任遂謫福建市舶

副提舉羅一峰劾大臣遭喪起復亦謫此官公謫同其地比歸閩人宗其道德風節乃立祠以祀二公云卽裏病就道或勸俟痊曰死吾分也敢少留邪是時死而復蘇遠近相傳爲野祭有一峰之後見先生語旣至閩布德宣威遠夷心服暇則講學不倦生徒日衆六月丙子江西宸濠果反敗庚辰閏八月聞外艱慟絕兼程而歸歸則哀毀骨立壹循朱子家禮辛巳夏世宗卽位肆赦諸竄謫者癸未服闋應詔復官翰林道濟入謁先師行釋菜禮周歷宮宇壇場

堂閣覽山川勝槩徘徊數日與聖公講士相見禮聖  
公固讓因錄所撰謁闈里記所畫闈里圖所貌夫子  
宮牆圖所行釋菜禮儀及士相見禮儀并問答五章  
聰句三十五韻總題曰東觀錄時吏部依詔書例  
陞俸一級公上辭陞俸級疏六月奏請勅命遂得  
貤恩又進公階儒林郎降勅褒之甲申春二月  
昭聖慈壽皇太后聖旦節公上乞命命婦朝賀疏  
謂皇太后奉陛下宗社大計而陛下承繼大  
統觀夫成王周公儀禮經文與我太祖制服之意

則是陛下于皇太后雖欲疏之有不能者是宜

率天下懼心以事其親而不可使皇太后之淒涼也三月乞致仕以圖便養疏再上不允洎夏又再上不允又乞改選以便養又不允時世宗欲尊

興獻王爲皇帝爲皇考

命下羣臣議大禮公執議

正統謂爲人後者爲之子不得顧私親疏凡三上固爭不得乃率朝紳慟哭於廟皇帝震怒杖如前幾死

罰俸三個月時奉太安人聶氏就養明年乙酉太安人卒于京扶柩南還行李蕭然抵家三月而葬生平

酷好周禮，詳加訂正，作五官序辨五卷、六官圖釋二卷，剔偽一卷，既乃校定正經，仍六卷，總之十有三卷。題曰：周禮定本。謂周禮者，至誠盡性之書也。門人魏公良貴，刻于寧波府官舍。又嘗修三禮書，未就而公辭世。公幼即穎拔，日記數千言，貫穿經史百家。于天文尤精，觀望星氣，有占必應。雖同館號知天文如黃公佐者，亦自以爲不及也。又言鐘律度量，所以治曆明時，康節粗得大意，而不能建律運曆，將舉禮樂，必也周公觀大司樂，則律曆備矣。識者謹之，七歲能詩。

十二工賦大或千言少僅數語志意溢發多所自得  
嘗語同館友曰心術與學術相符者也懷居與懷利  
相因者也怠勝敬欲勝義則其心死其學僞吾儕格  
君其豫在此謂太極圖亦則河圖與伏羲同功而不  
滿先儒本於易之說謂濂溪得斯道之正脈而直責  
程正叔之外師至於周禮一書嘗責漢儒多附會之  
罪宋儒乏表章之功謂周禮與儀禮戴記猶弱之於  
吳魏也賈氏以儀禮爲本周禮爲末謬妄已甚朱子  
乃不正之是其所惑也少擢大魁初不色喜繼謫閩

舶了無慍容、獨立敢言、不撓不懼、端居終日、未嘗晝寢、夜必計過自訟、晤卽相告、凡視聽言動、必準諸禮、不敢少失尺寸、每聞庭訓、惟恐行之不逮、比列侍從卽委身於國、曰此太史公教也、一聞高堂之疾、前後陳乞終養、無慮十疏、忠諫兩朝、先後一節、如諫南巡、議大禮、言必要諸大道、通籍十年、義氣激烈、諫而杖杖而竄、又復諫、又復杖、絕無一毫得失、死生之念、幼以聖賢自期、嘗悼異學之謬、曰空言無補、不若修其本以勝之、因取周子學聖有要數語、書之座右、繙

流羽客悉毅然絕之至于權倖奄宦有求通者拒之亦如釋老居閩未幾奔父喪琉球人自長史金爵而下莫不哀號追送扶母喪入江忽雲垂波立危甚乃爲文籲祭風濤頓息與朋友相劘切無幾微矯飾尤善成就後學嘗語之曰士當爵祿不在于心溝壑不忘于念公始生士人泊舟野江夜半聞曰狀元姓舒歿之前日門生謹袖夢垂白簾中有六字曰忠孝狀元止此歿之夕大風雷電伐木鳥巢覆屋瓦飛其關係有如此者病中矩度毫髮不踰臨終沐浴與衆揖

別長子泣問家事不答跪請所欲乃瞪目謂曰六經大明於世惟周禮未獲表章余生平精力盡在此書第未及進御爲歎爾爾其無忘乃父之志言畢而逝肅皇帝有精醇端介文魁天下賢名大振之褒又有陳仁義格君心之褒楊一清諸公稱之爲忠孝狀元至儕之伊洛之賢海內士以公與羅一峰並稱實不愧云

太常少卿楊忠愍公

事

永陵

忠愍公名繼盛直隸容城人幼苦家難貧楚甚力學堅苦嘉靖初仕爲南吏曹郎剔宿弊立章程吏曹肅然轉兵部車駕員外郎時虜方亟而部曹承習上下文書爲支吾大不愜會威寧侯鸞議開馬市部議推繼盛行繼盛具疏言馬市決不可開然旣已遣臣臣言其不可是避難也謹條開市五事一必令俺答愛子入侍二令盡還所捕虜邊氓三議開市後他種落入寇俱責保約四欲平馬價分爲三等五欲整兵爲

戰守備毋玩忽生虜心部尚書聞之曰如此則馬市不可開矣乃別遣主事行而繼盛疏竟上上三閱之曰繼盛言是旨甚溫而鸞有揭帖進乃下大臣八人者會議鸞寵方盛八大臣皆中憚附和許開市而繼盛遂逮獄訊謫狄道典史故事謫官者不事事繼盛乃日求民利病興革之疏桃水以灌塲開煤山以省薪芻狄道官無冊籍輸賦獨聽書筭生操重輕乃集書筭生科綜之於是異時飛詭之弊盡絕而贏糧數十石均諸民糧重地往求售不得者又傾貲易

其中二十訕助諸生。上官私易叛禍者拒不聽。已建書院。羣諸生學其中。建社館教番漢生學。於是士知嚮往。番漢生亦各各知揖讓敬長上矣。比去。民哭送者千人。明年遷諸城知縣。豪強歛戢。盜賊屏息。尋遷南部曹主事。已召入。遷刑曹。改兵武選郎。繼盛念起調籍。一歲官四遷。思所以報國者。於是以元旦日食具疏。大學士嵩專權誤國者十罪。逮詔獄。問主使。問引二王。蓋嵩意疑公嘗受業閣學士階。而二王爲上所諱言故也。繼盛對獄曰。今廷臣無慮皆嵩黨。孰

爲主使所爲 弼二王者以奸臣誤國雖能欺 皇上而不能欺二王蓋二王年幼又常不見 上非奸臣所避防至親莫如父子故幸 皇上一覺悟問之庶二王能言之也拷訊苦終不撓又明日下錦衣衛杖一百送法司附詐傳親王令旨律論死方繼盛詣衛受杖時校尉苗生者飲之酒曰此蚺蛇膽酒也可服繼盛曰椒山自有膽豈必蚺蛇哉遂談笑赴杖杖畢下刑部獄死復甦太息曰嗟夫忽然而死忽然而生如睡已又醒人死生固甚易也已益脫然時部諸司

皆憚輔臣頑繫之甚固繼盛自刮腐肉去膿血甚楚而泰然安之王比部世貞爲奔走求救王司業材請嵩爲力解輔臣陽出疏許諾而爲子世蕃及門客所持竟不上材流涕爭不得而繼盛竟死隆慶初贈太常少卿謚忠愍是時抗疏論輔臣罪者吳給事時來張主事翀董主事傳策翀以上憂邊甚具疏言國家所恃以屏翰醜虜者在邊鎮苟邊鎮諸臣皆由公推舉具得人則邊務畢飭何至若今日之紛紜哉自嵩輔政來一時督撫將帥盡行賄賂未推之先不論

其才。但通關節者乃得推。旣推之後。不論其功。但勤問安者。乃得遷。托名修邊者。非實修邊。以餽嵩也。托名築堡者。非實築堡。以餽嵩也。賄賂一入。或指敗爲功。或謂入爲遁。覆沒全軍者。得以蔭子。戕殺平民者。得以陞官。相欺相隱。日甚一日。至使 祖宗二百年以來。邊防之計。盡爲廢壞。如此。則醜虜安能不橫。右衛安得不困。臣竊謂嵩不能。雖有善用兵如韓信。李牧。邊防無能爲也。 國家定額。以給發各邊者。在戶部。苟戶部所發督撫將帥。盡得以供軍。當亦足用。何

至若今日之大困哉。自嵩輔政來，一時督撫將帥，既以賄賂爲事，必至尅減軍餉。臣每過長安街，見嵩門下絡繹悉邊鎮齋餽，未得見嵩，先餽其子世蕃，未見世蕃，先餽其家人。嚴年嚴年之富，已數十萬，則世蕃可知。語曰：人臣不可使富於國。嵩意欲何爲耶？致使軍餉盡歸私第，而沿邊將士凍餒不保朝夕。

祖宗

二百年以來，養軍之費，盡爲耗散。如此，則戶部安得不窮。臣竊謂嵩不能，雖有善理財如桑弘羊、劉晏，軍餉不能足也。夫邊防急矣，錢糧乏矣，使爲之人才者，

猶足以供陛下之用，則亦不足憂也。柰何今日之人才，久爲嵩所敗壞，無有底止。自嵩輔政以來，不顧朝廷名器，惟務私家囊橐。子世蕃市井無賴，倚藉父資，一時無恥之徒，如梟攫腐，如蛆蚋穢，或在外也，則圖爲改官，終日干謁於私第；或在外也，則謀爲遷秩，終歲打點於京師。有以三千五百調美官者，有以七百八百得美選者，公行白日，乞哀昏夜，遂致靡然成風，如喪心狂病。祖宗二百年以來，養士之節，其廉恥禮義，盡爲嵩所敗壞，又安望今日人才，有能負忠

爲國愛民憂時如昔人者耶臣竊謂嵩不罷則人才日下才下則理財禦邊終莫能爲也夫國家之最重且大至於邊防錢糧人才盡之矣今皆爲所敗壞如此陛下雖憂民之深求治之切亦奚益於治哉臣觀嵩爲人險足以傾人詐足以惑世辯足以亂正才足以濟惡附已者不顧公論立登之顯要不附已者不畏天道立陷之死地其意蓋將以箝天下之口使天下之人甚畏其威而不敢言也然後益得以恣其惡此忠義之士所以悒悒激憤懷深長之憂者

也。陛下聖神剛健黜妖臣趙文華百官兆民莫不舉手加額極口稱快以爲太平盛事今嵩罪浮文華十倍願賜罪斥則沿邊將士不戰而氣自倍百司庶府不令而政自新天下幸甚

光祿少卿沈公

事 永陵

青霞沈公名鍊字純甫越人也公少而讀書有異質從王伯安先生游先生一再與語卽奇之曰生千里木也辛卯舉鄉試又七年成進士爲溧陽令其治以搏擊豪強衛赤子爲急用伉倨忤御史得調茌平以父憂歸服除補清豐令錦衣帥陸炳聞而賢之請吏部得公爲經歷至則與鈞禮終不敢以分加公炳與嚴氏父子深相結以故公間從世蕃酒所世蕃嘗所狎客給事者飲非其任強灌之公卽以灌世蕃曰吾

代客酬也。喜從尚寶丞張遜業飲少飲輒醉。醉則擊缶鳴。嗚誦出師三表赤璧賦。已慷慨曼聲長嘯。泣數行下。於時虜闖入塞。都門不啓。天子坐西齋宮。憂之。會虜獲我中貴人爲嫚書附以進。曰。予我幣通貢。卽解圍。不者歲一髡而郭時華亭公領大宗伯要諸大臣。以御朝請。天子下其書。大宗伯會文武羣臣。計孰便。國子司業趙先生貞吉曰。虜所謂貢者耶。彼傳城而軍我。乃城下盟。竊以爲天子御奉天門。出內帑。賛士。醉言者旌功臣。虜固當自退。而檢討毛起。

囁嚅言吾姑寬虜以予貢而出之而後議守便趙先生廷叱之爭之堅而沈公復爲申趙理刺刺不休太宰夏公恠而問曰若何小吏也沈公目攝之曰大吏噤弗言故小吏言胡恠也且不曰主辱臣死耶太宰意不自得罷而華亭公持衆議上竟弗予貢次日天子出視朝有所誅進矣當是時沈公氣甚壯欲力吞虜幾得以身當一面畢見其長乃上疏言請以萬騎護陵寢萬騎防通州餉而令勤王之師十餘萬鼓而薄其惰歸必大勝報聞罷蓋是時相嚴嵩獨貴幸

用事數寢抑邊事不以報而見事急則若爲開言路  
有所誅進者將帥當事臣迫誅益入賊居間嵩以免  
而其進有時賄賄價舉起言者日以益嵩日以重於  
是沈公飲張丞所泣而歎曰詩不云乎歛歛訛訛亦  
孔之哀謀之其臧則具是違謀之不臧則具是依已  
矣亡所信吾謀矣吾卽不死而苞苴日蠶然過我而  
集於西第何也且夫社稷何賴焉乃抗疏言相嵩父  
子翼虎鼠社悞國大計請僇之以謝天下太宰阿私  
亡所異同宜從坐詔以公昔歲諱謹亡人臣禮今

復誣詆大臣自爲名、廷榜之數十、謫田塞外、而先是  
趙先生亦坐他法謫斥矣。沈公當田保安倉卒寄妻  
子廣柳車、未有舍而保安賈某者。傍睨公曰：公非上  
奇書請誅嚴氏人耶？揖之入、徙家而家沈公。公始有居  
矣。里長老問知沈公狀、咸大喜、助薪粲而遣其子弟  
來從學。公稍與語忠義大節、則又大喜、而塞外人慙、  
爭爲公誓相嵩以快公。公亦大喜、日相與誓嵩父子  
以爲常、至爲偶人三象。唐相林甫、宋相檜及相嵩、而  
射之、語稍稍聞。嵩父子銜之切骨、而侍郎楊順來總

督故嵩客也前大帥某業以選悞避虜俟其解則縱  
吏士取死人首甚者夜徼避兵入僇之以爲功沈公  
廉得其首主名貽書謂之前大帥恚旣得代卽以屬  
順曰是故撓乃公事者丁巳虜大入破應州堡四十  
餘順見以爲失事當坐益縱吏士殺僇避兵人上首  
功以自解而公復廉得其狀貽書謂順語加峻且賦  
詩及樂府者二或謂公遷人非有言責毋爲爾公怒  
曰吾嚮者豈亦有言責耶若視吾眼在否而欲盲我  
夫殺人而欺其君以要賞吾誓不與共天順聞益恚

以其私人經歷金紹魯指揮羅鑑走嵩子世蕃所曰  
是夫也結死士擊劙習射將以間而取若父子世蕃  
曰吾固知之卽以屬巡按御史李鳳毛鳳毛謬爲謝  
曰有之竊陰已解散其黨矣鳳毛得代歸遷爲光祿  
少卿而御史路楷好交<sub>人</sub>來又嵩客也世蕃爲酒壽楷而使  
謂順曰幸爲我除吾癘事成大者侯小者卿順則與  
楷合筭捕諸白蓮教通虜者竄公名籍中以謀叛聞  
而前大帥時理兵部無異取中旨僇公籍其家而予  
順一子錦衣千戶楷候遷五品卿寺順猶怏怏曰丞

相負我薄我賞猶有所不足乎謀之楷取公二子杖殺之而移檄越逮公長子諸生襄至則日掠治困急且死會給事中吳時來上疏論順楷誤國大罪上怒相嵩不及爲之地急下緹騎捕治順楷而襄得釋居久之相嵩敗世蕃殂死御史維新復論順罪而微爲襄理還其諸生穆宗初詔褒言事者沈公究始大白贈光祿少卿賜祭錄一子太學襄用諸生久次膺貢上春官伏闕上書極言總督順巡按楷殺人姦黨狀而給事時亮瓊相繼以封事請詔可捕順楷有趙

司寇獄論抵罪當虜掠近郊時都門閉公急謂陸公勿閉門閉門予敵民矣陸公爲言於上而許之所入男女以巨萬計公於詩文援筆立就奇麗甚而不能盡削其牢騷憤激之氣往往多楚聲以故人咸讀而憐之其死以丁巳之十月十七日得年五十有一子四長卽襄次袞次褒死公難最少子泰以稚免襄旣白報公讐推太學恩奏

論曰爲國擊嵩不勝公徒爲嵩擊公勝而公死公死不死神韓韓者億百千紀嗚呼嵩乎蕃乎順乎楷乎

死而死矣余謂公死而生嵩生而死公固流芳百世  
嵩亦遺臭萬年若嚴嵩諸人真所謂求死不得者曷  
嘗死也卓吾子私記

真諫

御史楊公

事 永陵

楊御史爵富平人也嘉靖中疏請慰人心以隆治道言臣惟人主一身用人行政萬化之本原也是非得失方在乎幾微而民心之向背天命之去就關焉甚可畏也聖帝明王深察乎此事無微而不謹時無暫而不懼爲大於細圖難於易故能天人交與而有以延祚於靈長今天下大勢極矣內而腹心外而百骸莫不受病因仍苟且兵戎廢弛奢侈妄費公私困竭奔競成俗賄賂公行遇災變而不憂非祥瑞而稱賀

謾說面諛，党同伐異。士風民俗，於此大壞。臣早夜耿耿，至痛心流涕，誠不忍默默保位。以上負洪恩，下負所學也。惟聖明垂聽焉。夫天下之患，莫大於以危爲安，以災爲利，以可憂爲太平。法家拂士日遠，而快意肆情之事無敢齟齬於其間。此積弊而蠱，所以爲不可救藥之病也。徃年夏秋恒暘不雨，畿輔千里無禾，歷冬無雪，暖氣如春。元旦僅雪即止，民失所望，渙沴無聊。此正陛下撤樂減膳，率羣下祈惠祐之時也。而大學士夏言數人者，方以爲靈瑞而稱頌之，不

幾於安危利災。以大可憂者爲樂耶。孔子告顏淵爲邦在遠。佞人如言等。所謂佞人非耶。大臣之職當輔君。當道志仁。先天下以爲憂。無忠亮體國之心。而居人臣之極位。是所謂小人乘君子之器者也。夫翊國公郭勦。中外皆知其爲天下之惡。朝廷之蠹也。迹其舉動。亦豈能有逃於聖鑒哉。顧聖德優容。不忍卽罪。神謀遠慮。自有所處。臣愚以爲奸不可近。惡不可長。若止之於微。遏之於漸。則朝廷優禮大臣。體貌未失。而武勲餘裔。亦得以善其終。或使稔惡肆

毒潛于政柄羣邪趨附善類退處於天下國家之禍必深矣治道去其太甚此其失人心而致危亂者一也天生斯民立之司牧君人者奉天安民而使之各得其所也古者民勤於食則百作廢今民勤食不得而顛連無告委命溝壑以至於死亡臣近巡南城兩月中凍餒死者八十一人此南城一郭耳其諸五城尚未知有幾也千里之遠耳目之所不及又不知其有幾也此皆陛下之赤子望豆蔬延須臾之生而不得正陛下憂民惜財與天下休息之時也而土

木之功。累年未止。工部屬官添設至數十員。又以一方士之故。差官萬里遠修雷壇。浚民膏血。而不知卹。民惟邦本。本固邦寧。窮民之財。盡民之力。其無乃自惑其根本也乎。昔漢文帝惜百金之費。而不營一臺。故海內富庶。隋氏以盛修宮室而至於亡。今北虜跳梁。內寇竊發。加以頻年災異。上下一空。百計取之。愈爲不足。而興作未已。以結怨於天下。此其足以失人心。而致危亂者二也。唐虞三代君臣。每每以勤敬之道。交相警戒。如堯兢兢。如舜業業。如禹惜寸陰。如文

王日晏不暇食、武王以敬勝怠、故能壽躋耄期、治隆  
熙泰、陛下卽位之初、勵精有爲、不遑寧處、嘗以敬  
一箴、頒天下於堯舜三王之道、蓋已心得而履行之  
矣。數年以來、朝儀間闕、經筵輶講、大小臣庶、朝參辭  
謝、未嘗得一覩。聖容敷奏、未嘗得一聆。天語今  
庶官入觀、遠自萬里、孰不欲一望天顏、以慰快覩  
之心、而咫尺闕庭、不得一見、臣恐人心日益怠惰、中  
外日益玩敝、非隆古君臣同寅協恭、以臻太平之氣  
象也、此其足以失人心而致危亂者三也。聖王之世、

執左道以惑人者必誅而保傅之職坐而論道古所謂官不必備惟其人者也今舉名器之重而畀諸迂恠之徒異言異服列於廷苑金紫赤綬延及方外而名器之濫極於此矣陛下以天縱聖資爲上天元后遠宗帝王之道近守祖宗之法細旃廣廈與公卿賢士講論治道則心正身修與天地合德日月合明和氣致祥罔有天灾山川鬼神亦莫不寧安用假此妖誕邪妄之術列諸法禁而藉之爲聖躬之福耶甚非天子所以崇正遠邪平平蕩蕩奉三無私

以化天下之道也臣恐風聲所及人趨異教貽四方之笑取百世之譏於聖德國政所損不細此其足以失人心而致禍亂者四也陛下臨御之初延訪忠諒虛懷納諫狂直敢言之士往往矜宥故一時臣工恃陛下能容敢以直言干冒天聽言過激切而不獲罪者亦多有之比年以來震之以天威加之以危禍如徃年太僕寺卿楊最言出而身立死近日左贊善羅洪先等皆以言爲罪而斥故臣下懷危慮禍無復有犯顏直諭以爲匡救逆耳之言夫成湯大

聖人也。仲虺稱其改過不吝、從諫弗咈。高宗商令主也。傳說以木從繩則正、后從諫則聖。勗之古今以來，有天下國家者，未有不以任諫而興、拒諫而亡者也。臣恐自今而後，雖懷忠義之心，非灰心仕進、甘退丘園，亦必深自晦藏，爲保身之計。孰敢發口論天下之事，以取死亡哉？忠盡杜口，則諂諛交進；上德不達，下情不通。堂陛之近遠於萬里，此其足以失人心而致禍亂者五也。伏願皇上念祖宗創業之艱難，思今日守成爲不易，戒勅夏言務篤忠貞以報國於郭勛。

預裁抑而保全之、止土木之功、開諫諍之路、屏邪問  
之術、一主於慎獨、以養天德、達王道、則莊敬日強、而  
眉壽千億、虛明照物、而忠邪莫逃、宗社萬萬年無疆  
之福。聖子神孫、萬萬年無疆之規、端在此矣。疏上、  
下詔獄、械繫者數年、雖處憂抑、中端凝正直、雖獄卒  
咸敬信之、久之得釋、而會尚書浹有陳論、上大恚  
曰、我固知釋爵、諸妄言歸過者立至矣、命卽與給事  
中怡郎中魁俱就逮、爵時抵家方一日、忽錦衣校至、  
曰、若復來乎、校素敬爵、慰之曰、吾欲有他往特一省

公爵笑曰。吾知之。與校同飯。飯糲食。校不能堪。爵唱  
茹。自若也。食已。曰。行乎。校曰。宜一入爲別。爵立屏前  
曰。朝廷有旨。見逮。吾行矣。卽攬袂行。復再踰年  
乃出。

太子少保海忠介公

事

永陵

今上

公名瑞，字汝賢，廣東瓊山人。以鄉舉爲南平學教諭。初至謁上官，止長揖曰：吾師席也，可屈膝乎？因著論云：孟子言爲貧而仕者非也。抱關擊柝，委吏乘田，無在非道而尤莫如教職。蓋人材所由造，世運所由理，其職亦何尊且難乃稱爲貧哉？自世沿此說，不察故居此官者多媿媿不舉其職。士習蠱而吏治渝，所從來矣。持論若此，尋進淳安令。淳巖邑也，地瘠而民嗇，所產茶竹杉柏外，無他物。且重巖複嶂，民易逃匿。山

下田畝悉歸右姓窮民卒歲不粒食又當新安下流諸官舫日五六至夫役迎送費不可支公慨然思拯之初入署例有燕公第以祀神牲草草治具乃召丞尉若學官弟子若耆老以次列備陳所爲奉法字下意甚悉竟日散去淳安人固沾沾知令志有在矣無何度田定稅不使窮富得上下其手官署中有隙地課老僕樹禾麥藝蔬菜旦夕取自贍自江水外無關淳安者胡公宗憲總制浙直權甚重家僅過淳安公無加饋制府竟無讓一日語藩臬曰昨聞海令爲母

壽市肉二斤矣。蓋異之也。豐城鄆懋卿由中臺出理鹽政，勢張甚。所至縣令如上供以得無叱辱爲幸。維揚三臺使、釀燕之費，至于千餘金。鄆將往徽齊雲牒所過郡縣供辦，令甚峻。及淳安公乃爲書上鄆，甚言邑小不足奉迎，至且見罪，願取他道往。且言汰侈不可爲，與小民不當虐者甚具。鄆得書色變，久之遂罷齊雲行，曰：「令言是也。」藩臬郡守聞之股慄，曰：「令何憲，幾累我輩矣！」公時已晉嘉興別駕，鄆私人御史袁迎鄆，意以他事摘公，從舊職論調興國。興國地故單薄，歲

賦不入民苦浮糧爲患公述八事上之中丞而獨亟  
清丈以甦貧民而均其賦已陞戶部主事時 肅皇  
帝尚玄修朝政多曠公慷慨言天下大計謂興土木  
爲傷民數推廣事例爲鬻爵以師陶仲文爲非體以  
仙桃藥丸爲恠妄甚者以不見二王不還大內誹謗  
猜疑謬辱臣下爲薄于父子夫婦君臣其言皆敵以  
下所不能堪者 上震怒投其章于地已徐閱之意  
若爲動者留踰月不下而會 上意有所不可遂下  
公詔獄中外縉紳相顧失色而公直聲亦遂聞天下

亡何。肅皇帝崩。莊皇帝奉遺詔出公獄還其官。尋改兵部主事。已晉丞尚寶丞大理。南京通政入爲左通政。遂以僉都御史撫應天時。公威名籍甚。中外墨吏往往望風解印去。權豪怙勢之家率相戒。毋敢犯。一顯者。赭其門以居。聞公至。卽易赭而黝。中人監造者。以八人肩輿行見公。亦減其半云。吳故有松江。匯震澤入海。瀕江田。藉其灌漑。已爲潮齏淤爲陸。公斥羨募工。乘輕舟。躬督畚鍤開濬之。不旬月而成。又吳俗貧富相傾。弱者率獻田于其豪。以爲奸利。輸不

必入公獨卵翼窮民而摧折士大夫之豪有力者是時吳中貴人無逾華亭相按問其家無少貸而弟侍郎陝武斷殘民輒逮治如律盡奪還其侵田自是士大夫之名貪暴者多竄跡遠郡以避小民始忻忻有更生之望矣公嘗論欲天下太平惟有井田一法井田之壞而不復也惟有亟奪民田一言至於不得已而限田又不得已而均稅策斯下矣然猶爲井田之遺意故其令疲邑撫三吳皆以清丈爲急而力行條編一法令額外征徭不至重困之至今小民得保守

田業相率繪公像而尸祝之比比也。然公竟以奪富  
民田府怨而議者亦以此中公。遂解官歸里。居十餘  
年。九卿若臺省。前後薦公者無慮十餘疏。今上聞  
公名。起公南僉都御史。旋以爲南吏部侍郎。公至首  
陳治安要機。謂今日貪墨爲姦。決不可縱。而歸本君  
身。多責難語。疏奏上。深鑒其忠。屢欲召用。而柄地  
有陰沮者。乃以爲都御史掌南院。浹歲三遷。皆出  
特簡。海內端人。舉手相慶。以爲特達之知。而小人之  
不便者。顧目公爲迂闊。詆之甚力。章亦寢不下。公屢

疏乞歸。上屢報聞，竟以丁亥卒于官。卒之日，貧無可給棺槨。士大夫醵金以殮。士民哭公至罷市者數日。祭于塗，累數百里，不絕。訃聞，上震悼久之。贈太子少保，謚忠介。

續藏書卷二十三終